

# ESTATUTOS DA FUNDACIÓN BENÉFICO-DOCENTE DENOMINADA FUNDACIÓN NOVAS

## TÍTULO PRIMEIRO

### DISPOSICIÓNS XERAIS

#### **Artigo 1. Denominación e natureza**

Ao abeiro do dereito recoñecido no artigo 34.1 da Constitución española, coa denominación de "FUNDACIÓN NOVAS", constituíuse unha organización de natureza fundacional, creada por Don JOSÉ NOVAS REGUEIRA (Joseph Novas Jr., como é coñecido en Estados Unidos, onde ten a súa residencia) e declarada benéfico docente de interese galego, sen ánimo de lucro, cuxo patrimonio está afectado de modo duradeiro á realización dos fins de interese xeral que se establecen nestes estatutos.

#### **Artigo 2. Domicilio e ámbito de actuación**

O domicilio social da FUNDACIÓN NOVAS establécese na rúa Eduardo Vincenti, número 47, de Bueu, provincia de Pontevedra, na Comunidade Autónoma de Galicia.

O Padroado poderá promover o cambio de domicilio, mediante a oportuna modificación estatutaria, con posterior comunicación ao Protectorado e inscrición no Rexistro de Fundacións.

A Fundación desenvolverá as súas actividades principalmente no territorio da Comunidade Autónoma de Galicia.

Para o mellor cumprimento dos seus fins, a Fundación poderá crear delegacións en territorio distinto ao do seu ámbito de actuación, así como establecer relacións instrumentais con terceiros en calquera ámbito territorial.

#### **Artigo 3. Personalidade e capacidade**

A Fundación ten personalidade xurídica desde a inscrición da escritura pública de constitución no Rexistro de Fundacións de Interese Galego, que lle atribúe plena capacidade xurídica e de obrar, e poderá realizar, en consecuencia, todos aqueles actos que sexan necesarios para o cumprimento dos fins fundacionais, con suxeición ao establecido no ordenamento xurídico.

#### **Artigo 4. Duración**

A Fundación constituíuse por tempo indefinido. Porén, se nalgún momento os fins propios da Fundación se consideraren cumpridos, ou fora imposible a súa realización, o Padroado poderá acordar a extinción, de conformidade co disposto na lexislación vixente e nestes estatutos.

#### **Artigo 5. Réxime normativo**

A Fundación rexerese pola vontade do fundador expresada nestes estatutos, polas disposicións que en interpretación e desenvolvemento deles estableza o Padroado e, en todo caso, pola Lei do Parlamento de Galicia 12/2006, do 1 de decembro, de fundacións de interese galego; polo Decreto 14/2009, do 21 de xaneiro, polo que se aproba o Regulamento de fundacións de interese galego; polo Decreto 15/2009, do 21 de xaneiro, polo que se aproba o Rexistro de Fundacións de Interese Galego, e polas demais normas que as desenvolvan ou substitúan.

Así mesmo, tamén se rexerá polas disposicións que lle sexan aplicables da Lei 50/2002, do 26 de decembro, de fundacións; pola Lei 49/2002, do 23 de decembro, de réxime fiscal das entidades sen fins lucrativos e dos incentivos fiscais ao mecenado, e polo Real decreto 1270/2003, do 10 de outubro, polo que se aproba o Regulamento para a aplicación do réxime fiscal das entidades sen fins lucrativos e dos incentivos fiscais ao mecenado, así como pola restante normativa que sexa de aplicación.

## **TÍTULO SEGUNDO**

### **OBJECTO DA FUNDACIÓN**

#### **Artigo 6. Fins**

A Fundación ten por obxecto a concesión de axudas docentes e benéficas ás cales poderán optar estudantes cuxa actividade se desenvolva en Galicia, dándose preferencia a todas aquelas solicitudes que realicen os alumnos/as dos colexios e institutos radicados no termo municipal de Bueu (provincia de Pontevedra). Os centros de Educación Infantil, Primaria, Secundaria, Bacharelato e Formación Profesional radicados no concello de Bueu tamén poderán beneficiarse destas axudas benéficas, previo acordo expreso do Padroado da Fundación Novas.

6.1.- Co fin de plasmar os obxectivos da Fundación, establécense as seguintes bases para a obtención das becas/bolsas universitarias e das axudas económicas:

6. 1. 1.- Poderán optar a estas convocatorias con carácter preferente todos aqueles estudantes que sexan veciños do concello de Bueu (provincia de Pontevedra), en xeral, valorándose prioritariamente o ser naturais da parroquia de Beluso, por expreso desexo do fundador D. José Novas Regueira.

6.1.2.- Para a obtención destas becas/bolsas de axuda teranse en conta por parte do Padroado da fundación o seguinte:

a) A situación económica familiar do solicitante, atendéndose prioritariamente as peticións daqueles estudantes cunha situación económica insuficiente para facilitar o seu acceso aos estudos superiores, sexan profesionais ou universitarios.

b) O expediente académico do solicitante será debidamente certificado e compulsado polo centro ou centros onde cursou os seus estudos, valorándose as cualificacións medias máis altas.

6.1.3.- O Padroado da Fundación tamén estudiará e, no seu caso, atenderá aquelas solicitudes de axudas económicas benéficas para atender actividades sociais, culturais, cívicas ou deportivas, así como dotar do material que precisen aos distintos centros educativos do concello de Bueu (Pontevedra), que teñan como fin a aprobación académica dos alumnos/as destes centros.

6.1.4.- O prazo de presentación das distintas solicitudes estará comprendido entre os meses de xaneiro a xuño, ambos inclusivos.

6.1.5.- O Padroado da Fundación fará público o fallo, que será inapelable, no transcurso dos meses de xullo e agosto, comunicando a súa decisión aos interesados.

6.1.6.- As becas/bolsas e as axudas se concederán polo tempo comprendido no curso escolar seguinte ao fallo do Padroado.

6.1.7.- O Padroado poderá suspender o pago destas axudas concedidas cando, a seu entender, exista por parte do beneficiario un incumprimento das obrigacións contraídas; cando os informes das autoridades académicas fagan aconsellable esta decisión ou non se destine o diñeiro percibido aos fins establecidos por esta Fundación.

6.1.8.- A Fundación, ao través do seu Padroado, queda facultada para resolver as dúbidas que poderán xurdir na interpretación destas bases.

6.1.9.- O número e dotación de cada unha das becas/bolsas e axudas benéficas que o Padroado decida conceder cada ano será decidido en función das circunstancias específicas de cada solicitante.

6.2.- As actividades obxecto da finalidade da FUNDACIÓN NOVAS realizaranse con exclusión de todo ánimo ou propósito de lucro e na medida que o permitan as rendas xeradas polo Patrimonio fundacional e as subvención e axudas que se obteñan.

Os fins da entidade serán de carácter educativo, cultural, deportivo, cívico, científico e de defensa do ambiente e da sociedade de desenvolvemento da información e da tecnoloxía.

O desenvolvemento do obxecto fundacional poderá ser realizado directamente pola Fundación ou mediante colaboración con outras entidades, organismos, institucións ou persoas que contribúan á consecución dos fins fundacionais.

### **Artigo 7. Actividades fundacionais**

Para a consecución dos fins mencionados no artigo anterior, a Fundación pode realizar as seguintes actividades:

- a) Concesión de Becas/bolsas e axudas a estudantes do concello de Bueu, en xeral, e de xeito prioritario da parroquia de Beluso, por expreso desexo do seu fundador, D. José Novas Regueira
- b) Concesión de axudas económicas a entidades educativas, sociais, culturais, cívicas, municipais ou deportivas do concello de Bueu.
- c) Concesión de axudas económicas a centros educativos, colexios e institutos radicados no concello de Bueu.

A Fundación poderá realizar actividades económicas que teñan por obxecto o cumprimento dos fins fundacionais, ou sexan complementarias ou accesorias das anteriores, con sometemento ás normas reguladoras da defensa da competencia.

### **Artigo 8. Liberdade de actuación**

O Padroado terá plena liberdade para determinar as actividades da Fundación tendentes á consecución daqueles obxectivos concretos que, ao xuízo daquel e dentro do cumprimento dos seus fins, sexan máis adecuados ou convenientes en cada momento.

## **TÍTULO TERCEIRO**

### **REGRAS BÁSICAS PARA A APLICACIÓN DOS RECURSOS AO CUMPRIMENTO DOS FINES FUNDACIONAIS E PARA A DETERMINACIÓN DOS/AS BENEFICIARIOS/AS**

#### **Artigo 9. Destino das rendas e ingresos**

A Fundación destinará o patrimonio e as súas rendas ao cumprimento dos fins fundacionais.

Á realización dos fins fundacionais deberá ser destinado, polo menos, o setenta por cento dos resultados das explotacións económicas que se desenvolvan e dos ingresos que se obteñan por calquera outro concepto, deducidos os gastos realizados para a súa obtención, e o resto deberase destinar a incrementar a dotación fundacional ou a reservas, segundo acordo adoptado polo Padroado. Non se incluírán no cálculo dos ingresos as doazóns recibidas en concepto de dotación, nin as ganancias obtidas na transmisión de bens ou dereitos afectados á dotación fundacional, sempre que se reinvestan en bens dotacionais.

O prazo para o cumprimento desta obriga será o comprendido entre o inicio do exercicio en que se obtiveron e os catro anos seguintes ao peche do dito exercicio

Os gastos de administración non poderán superar a porcentaxe fixada na lexislación vixente.

#### **Artigo 10. Publicidade das actividades**

O Padroado dará información suficiente dos fins e das actividades da Fundación, a través de páxina web, nos termos sinalados no artigo 27 do Decreto 14/2009, do 21 de xaneiro, polo que se aproba o Regulamento de fundacións de interese galego, para que sexan coñecidos polos eventuais beneficiarios e demais interesados.

#### **Artigo 11. Beneficiarios/as**

Os fins da Fundación están dirixidos, con carácter xenérico, ás seguintes colectividades de persoas:

- a) Estudantes de centros escolares do concello de Bueu
- b) Colexios, institutos e outros centros educativos de Bueu
- c) Entidades educativas, sociais, culturais, deportivas, cívicas e municipais do concello de Bueu.

A determinación dos/as beneficiarios/as será efectuada polo Padroado con criterios de imparcialidade e non discriminación.

As regras básicas para a determinación dos/as beneficiarios/as son as seguintes:

- a) Estudantes de centros escolares de Bueu, con preferencia para os naturais da parroquia de Beluso, cunha situación económico familiar insuficiente para facilitar o seu acceso aos estudos superiores, sexan universitarios ou profesionais.
- b) Centros escolares do concello de Bueu con necesidades de axudas para dotación de material ou de organización de actividades docentes.
- c) Entidades educativas, culturais, sociais, deportivas, cívicas ou municipais de Bueu que soliciten axudas económicas para o seu desenvolvemento ou organización de eventos.

### **TÍTULO CUARTO**

#### **ÓRGANOS DA FUNDACIÓN: ÓRGANOS DE GOBERNO E ÓRGANOS DE XESTIÓN**

##### **I – ÓRGANOS DE GOBERNO**

#### **Artigo 12. O Padroado**

O Padroado é o órgano de goberno, representación e administración da Fundación, e executará as funcións que lle corresponden con suxeición ao disposto no ordenamento xurídico e nestes estatutos.

Corresponde ao Padroado o cumprimento dos fins fundacionais e a administración dos bens e dereitos que integran o patrimonio da Fundación, mantendo o seu rendemento e utilidade.

#### **Artigo 13. Carácter gratuito do cargo de patrón/patroa**

Os patróns e patroas exercerán o seu cargo gratuitamente, sen prexuízo do dereito a que se lles reembolsen os gastos debidamente xustificadas que o desempeño da súa función lles ocasione.

#### **Artigo 14. Composición**

O Padroado estará composto como mínimo por un/unha PRESIDENTE/A, un/unha VICEPRESIDENTE/A, un/unha SECRETARIO/A e un/unha TESOUREIRO/A e D. JOSÉ NOVAS REGUEIRA (JOSEPH NOVAS JR., como é coñecido en Estados Unidos) como Presidente de Honra e con carácter vitalicio. Dentro destes límites, corresponderalle ao Padroado determinar o número concreto de membros.

Poderán ser membros do Padroado as persoas físicas que teñan plena capacidade de obrar e non estean inhabilitadas para o exercicio de cargos públicos nin se atopen incursas en causa de incompatibilidade.

As persoas xurídicas poderán formar parte do Padroado e deberán designar a persoa física que as represente.

Os patróns e patroas que sexan persoas físicas deberán exercer o seu cargo persoalmente; non obstante, poderá actuar no seu nome e representación doutro patrón ou patroa designado por el/ela.

#### **Artigo 15. Regras para a designación e substitución dos seus membros**

A designación dos membros que integran o primeiro Padroado foi efectuada polos fundadores e consta na escritura de constitución, con data de 12 de xullo de 1993, ante o notario D. Rafael Sanmartín Losada, en Pontevedra.

A designación de novos membros será realizada polo Padroado que figure inscrito no Rexistro de Fundacións de Interese Galego, por acordo da maioría absoluta dos seus membros.

Os/as patróns/patroas desempeñarán as funcións do seu cargo con carácter indefinido.

#### **Artigo 16. Aceptación dos membros do Padroado e inscrición no rexistro**

Os patróns e patroas entrarán a exercer as súas funcións logo de aceptaren expresamente o seu cargo. Esta aceptación poderá constar en documento público independente, en documento privado con sinatura lexitimada por un fedatario público, mediante comparecencia realizada ante o Rexistro de Fundacións de Interese Galego, ou perante o Padroado, que neste último caso se acreditará mediante certificación expedida polo/a secretario/a co visto e prace do/a presidente/a.

A designación dos membros do Padroado e os seus cargos e a correspondente aceptación serán notificadas polo Padroado ao Protectorado e inscritas no Rexistro de Fundacións de Interese Galego.

#### **Artigo 17. Organización do Padroado**

O Padroado designará de entre os seus membros un/unha presidente/a e un/unha vicepresidente/a, de ser o caso.

Así mesmo, o Padroado designará un/unha secretario/a, cargo que poderá recaer en persoa allea ao Padroado; neste caso terá voz pero non voto.

Salvo os de presidente/a e secretario/a, os demais cargos do Padroado poderán ser acumulables.

### **Artigo 18. O/A presidente/a**

Ao presidente/a correspóndelle exercer a representación da Fundación ante toda clase de persoas, autoridades e entidades públicas ou privadas; acordar a convocatoria das reunións do Padroado; fixar a orde do día; presidir as reunións; dirixir e moderar os debates; someter a votación os acordos e, de ser o caso, dispoñer a execución dos acordos adoptados, para o cal poderá realizar toda clase de actos e asinar os documentos que sexan necesarios para tal fin.

O/A presidente/a dispón de voto de calidade para resolver os empates que se poidan producir nas votacións das reunións do Padroado.

### **Artigo 19. O/A vicepresidente/a**

Corresponderalle ao vicepresidente/a realizar as funcións do/a presidente/a nos casos de vacante, ausencia ou enfermidade. Tamén poderá actuar en representación da Fundación naqueles supostos en que así se determine por acordo do Padroado.

### **Artigo 20. O/A secretario/a**

Son funcións do/a secretario/a:

- a) Efectuar a convocatoria das reunións do Padroado por orde da presidencia e realizar as correspondentes citacións aos membros do Padroado.
- a) Asistir ás reunións do Padroado, con voz e voto se forma parte do Padroado, ou só con voz en caso contrario.
- b) Custodiar a documentación da Fundación, redactar as actas correspondentes ás reunións do Padroado e transcribilas ao correspondente libro de actas.
- c) Expedir as certificacións co visto e prace da presidencia, en relación cos acordos adoptados polo Padroado.
- d) Calquera outra inherente á súa condición de secretario/a, e aquelas que expresamente lle sexan atribuídas.

Nos supostos de vacante, ausencia, imposibilidade ou enfermidade, o secretario será substituído polo membro do Padroado que sexa acordado polos restantes membros.

### **Artigo 21. O/A tesoureiro/a**

Son funcións do/a tesoureiro/a:

- a) Supervisar a contabilidade da Fundación e o seu axuste ás normas vixentes en cada momento.
- b) Elaborar e presentar os proxectos de presupostos e contas anuais que van ser sometidas á aprobación do Padroado, así como controlar e supervisar a súa execución.
- c) Recadar e custodiar os fondos destinados á Fundación.
- d) Recomendar ao Padroado as inversións financeiras que resulten pertinentes e presentar, no seu caso, un informe anual sobre o seu cumprimento, especialmente no caso da realización de inversións temporais.

### **Artigo 22. Facultades do Padroado**

Na súa actuación, o Padroado deberase axustar ao preceptuado na lexislación vixente e á vontade dos fundadores manifestada nestes estatutos.

Con independencia das funcións que lle atribúen os presentes estatutos e sen prexuízo de solicitar, se é o caso, as preceptivas autorizacións ao Protectorado, a título enunciativo, serán facultades do Padroado:

- a) Exercer o goberno, a representación, a inspección, a vixilancia e a orientación da Fundación.
- b) Interpretar e desenvolver os presentes estatutos e, de ser o caso, adoptar acordos sobre a súa modificación, sempre que resulte conveniente para os intereses da Fundación e a mellor consecución dos seus fins.
- c) Fixar as liñas xerais de funcionamento da entidade e de distribución e aplicación dos fondos dispoñibles entre as actividades da Fundación.
- d) Acordar a apertura e o peche dos seus centros, oficinas e delegacións
- e) Nomear apoderados xerais ou especiais, outorgar poderes e revogalos.
- f) Aprobar o plan de actuación e as contas anuais que serán obxecto de presentación ao Protectorado.
- g) Delegar as súas facultades nun ou máis patróns/patroas, sen que poidan ser obxecto de delegación:
  - A aprobación das contas anuais e do plan de actuación.
  - A modificación dos estatutos.
  - O acordo de fusión, extinción ou liquidación da Fundación.
  - Calquera acto que precise a autorización ou aprobación do Protectorado.

### **Artigo 23. Obrigas e dereitos dos membros do Padroado**

Na súa actuación, o Padroado deberase axustar ao establecido na lexislación vixente e á vontade do fundador manifestada nestes estatutos.

Son obrigas dos membros do Padroado:

- a) Cumprir e facer cumprir os fins fundacionais.
- b) Administrar os bens e dereitos que integran o patrimonio da Fundación mantendo o seu rendemento, utilidade e produtividade segundo os criterios económico-financeiros dun bo xestor.
- c) Asistir ás reunións do Padroado e velar pola legalidade dos acordos que se adopten nelas.
- d) Realizar os actos necesarios para a inscrición da Fundación no Rexistro de Fundacións de Interese Galego.

Son dereitos dos membros do Padroado:

- a) Recibir a convocatoria coa orde do día e asistir ás reunións dos órganos de que formen parte.
- b) Exercer o dereito de voto.
- c) Obter a información precisa para o cumprimento das súas funcións.

### **Artigo 24. Responsabilidades dos patróns e patroas**

Os patróns e patroas deberán desempeñar o seu cargo coa dilixencia dun representante leal.

Os patróns e patroas responderán solidariamente fronte á Fundación dos danos e perdas que causen por actos contrarios á lei ou aos estatutos ou polos realizados sen a dilixencia con que deben desempeñar o cargo. Quedarán exentos de responsabilidade os/as que voten en contra do acordo e os/as que proben que, non intervindo na súa adopción e execución, descoñecían a súa existencia ou, coñecéndoa, fixeron todo o conveniente para evitar o dano ou, polo menos, se opuxeron expresamente a aquel.

### **Artigo 25. Cesamento e suspensión dos membros do Padroado**

O cesamento e suspensión dos membros do Padroado producirase nos supostos previstos no artigo 24 da Lei 12/2006, do 1 de decembro, de fundacións de interese galego.

A renuncia ao cargo de patrón ou patroa poderá facerse por calquera dos medios e cos trámites previstos para a aceptación e deberá levarse a cabo por calquera dos medios e mediante os trámites previstos para a aceptación.

O cesamento e a suspensión dos membros do Padroado comunicáraselle ao Protectorado e inscribírase no Rexistro de Fundacións.

### **Artigo 26. Reunións do Padroado**

O Padroado reunirse, polo menos, dúas veces ao ano e tantas veces como sexa preciso para a boa marcha da Fundación. Corresponde ao/á presidente/a ordenar a convocatoria das reunións, por propia iniciativa ou por petición das dúas terceiras partes dos membros do Padroado.

A convocatoria expresará a orde do día, así como o lugar, a data e a hora da reunión. Cursarase por escrito e farase chegar a cada un dos membros, polo menos, con nove días de anticipación á data da súa celebración, por calquera medio que permita deixar constancia da súa recepción.

Non será precisa convocatoria previa cando, estando presentes todos os patróns e patroas, acorden por unanimidade a celebración da reunión e a correspondente orde do día.

### **Artigo 27. Formas de deliberar e adoptar acordos**

O Padroado entenderase validamente constituído cando concorran, presentes ou representados, na forma legalmente establecida, polo menos a metade máis un dos seus membros.

Os acordos serán inmediatamente executivos e adoptaranse por maioría absoluta dos asistentes; en caso de empate será dirimente o voto do presidente. Non obstante, requirirase voto favorable de todos os membros do Padroado para aprobar acordos que se refiran á reforma ou modificación dos estatutos, e á disposición de bens a título gratuito, á fusión, á escisión ou á extinción da Fundación.

Das reunións do Padroado elaborará a acta o secretario, que deberá ser subscrita por todos os membros presentes e aprobada na mesma ou na seguinte reunión. Unha vez aprobada, transcribírase no correspondente libro de actas e será asinada polo/a secretario/a co visto e pracedo/a presidente/a.

## **II – ÓRGANOS DE ASESORAMENTO E XESTIÓN**

### **Artigo 28. Consellos asesores**

O Padroado poderá crear consellos asesores e comisións de estudo, así como órganos similares con funcións de apoio e asesoramento, para o mellor desenvolvemento dos fins fundacionais. A creación, modificación e supresión destes órganos, así como a súa composición, deberán ser notificadas ao protectorado e inscritas no Rexistro de Fundacións.



## **Artigo 29. Xerente**

O Padroado poderá acordar a contratación dun director/xerente ou directora/xerente con competencias en materia de xestión e administración da Fundación. A súa designación e cesamento deben ser notificados ao Protectorado e inscritos no Rexistro de Fundacións.

## **TÍTULO QUINTO**

### **RÉXIME ECONÓMICO**

#### **Artigo 30. Patrimonio fundacional**

O patrimonio da Fundación está integrado por toda clase de bens, dereitos e obrigas susceptibles de valoración económica que integren a dotación, así como por aqueles que adquira a Fundación con posterioridade á súa constitución, tanto se se afectan á dotación como se non.

Uns e outros deberán figurar a nome da Fundación, constar no seu inventario e no Rexistro de Fundacións de Interese Galego.

O Padroado promoverá, baixo a súa responsabilidade, a inscrición a nome da Fundación dos bens e dereitos que integran o seu patrimonio nos rexistros públicos correspondentes.

O capital inicial da FUNDACIÓN NOVAS está constituído polos bens aportados polo seu fundador, D. JOSÉ NOVAS REGUEIRA (Joseph Novas Jr., como é coñecido en Estados Unidos, lugar da súa residencia), con un valor total de VINTE MILLÓNS DE PESETAS (120.202,42 EUROS).

#### **Artigo 31. Adscrición do patrimonio fundacional**

Os bens e dereitos que conforman o patrimonio, así como as rendas que produzan, quedarán vinculados ao cumprimento dos fins que a Fundación persegue, nos termos establecidos na lexislación vixente e nos estatutos.

#### **Artigo 32. Financiamento**

A Fundación, para o desenvolvemento das súas actividades, financiarase cos recursos que proveñan do rendemento do seu patrimonio e, se for o caso, con aqueles procedentes das axudas, subvencións, doazóns, herdanzas ou legados que reciba de persoas ou entidades, tanto públicas como privadas.

A Fundación poderá percibir cantidades derivadas de actividades e servizos directamente prestados por ela aos seus beneficiarios sempre que isto:

- a) Non desvirtúe o interese xeral para a Comunidade Autónoma.
- b) Non sexa contrario á vontade fundacional.
- c) Non implique unha limitación inxustificada do ámbito dos seus posibles beneficiarios.

Na xestión económico-financeira, a Fundación rexerese de acordo cos principios e criterios xerais determinados na normativa vixente.

#### **Artigo 33. Plan de actuación**

O Padroado aprobará e remitirá ao Protectorado, nos últimos tres meses de cada exercicio, un plan de actuación en que se conteñan os obxectivos e as actividades que se teña previsto

desenvolver no exercicio seguinte, xunto coa previsión de ingresos e gastos e unha memoria explicativa del. O dito plan será depositado no Rexistro de Fundacións de Interese Galego.

#### **Artigo 34. Contas anuais**

A Fundación levará unha contabilidade ordenada e adecuada á súa actividade que permita o seguimento cronolóxico das actuacións realizadas. Para iso, contará cun libro diario e un libro de inventarios e contas anuais.

As contas anuais comprenden o balance, a conta de resultados e unha memoria. Estes documentos forman unha unidade e deben ser elaborados seguindo os modelos, normas e criterios establecidos na adaptación sectorial do Plan xeral de contabilidade para as entidades sen fins lucrativos.

As contas anuais serán formuladas polo órgano de goberno da entidade, o cal responderá da súa veracidade. Deberán ser aprobadas polo Padroado no prazo de seis meses desde o peche do exercicio económico e presentaranse ante o Protectorado no prazo de vinte días hábiles seguintes ao da súa aprobación para o seu exame e posterior depósito no Rexistro de Fundacións de Interese Galego.

Nos casos en que as contas anuais se sometan a auditoría, serán formuladas dentro dos tres (3) primeiros meses seguintes ao día do peche do exercicio. Neste caso presentarase, xunto coa documentación contable, o informe de auditoría correspondente.

#### **Artigo 35. Exercicio económico**

O exercicio económico da Fundación coincidirá co ano natural.

### **TÍTULO SEXTO**

#### **DA MODIFICACIÓN, FUSIÓN, ESCISIÓN OU EXTINCIÓN**

##### **Artigo 356. Modificación de estatutos**

Por acordo do Padroado poderán ser modificados os presentes estatutos, sempre que resulte conveniente para os intereses da Fundación e se cumpran os requisitos previstos nestes estatutos e na lexislación vixente.

Procederase á dita modificación cando as circunstancias que presidiron a constitución da Fundación teñan variado de tal maneira que esta non poida actuar satisfactoriamente de conformidade cos estatutos en vigor.

##### **Artigo 37. Fusión e/ou escisión**

A Fundación poderase fusionar con outra ou outras, logo do acordo dos respectivos padroados. Igualmente, o Padroado poderá aprobar a escisión de parte da Fundación nos termos e cos requisitos legalmente establecidos.

##### **Artigo 38. Extinción da Fundación**

A Fundación extinguirase polas causas legal e estatutariamente establecidas e de acordo cos procedementos previstos na normativa vixente.

### **Artigo 39. Liquidación e adxudicación**

A extinción da Fundación determinará a apertura do procedemento de liquidación, que será realizada polo Padroado baixo o control do Protectorado.

Os bens e dereitos resultantes da liquidación destinaranse ás fundacións ou ás entidades non lucrativas, privadas ou públicas, que persigan fins de interese xeral e que teñan afectados os seus bens, incluso para o suposto de disolución, á consecución daqueles, e que estean consideradas como entidades beneficiarias do mecenado, ou a entidades públicas de natureza non fundacional que persigan fins de interese xeral.

Corresponde ao Padroado designar as entidades receptoras destes bens, de acordo co establecido na lexislación vixente.

### **Artigo 40. Adopción dos acordos e comunicación e inscrición no Rexistro**

Para a adopción de acordos de modificación, fusión, escisión, extinción e liquidación será necesario o voto favorable de todos os membros do Padroado.

Os ditos acordos serán comunicados e/ou autorizados ante o Protectorado para os efectos de cualificación de legalidade, formalizados en escritura pública e inscritos no Rexistro de Fundacións de Interese Galego.

### **CLÁUSULA ADICIONAL**

O contido destes estatutos non implica limitación ou substitución das competencias que a lexislación vixente atribúe ao Protectorado.

A interpretación do establecido nestes estatutos farase en concordancia coa normativa sectorial, que, así mesmo, será aplicable no non previsto neles.